


Peletakkan jawatan beri kesan kepada rakyat, negara

BH- 14/8/2021
m/s: 2



Muhyiddin pada Ucapan Khas Perdana Menteri di Bangunan Perdana Putra, Putrajaya, semalam.
(Foto BERNAMA)

Kemelut politik tak berkesudahan gagal sasar capai imuniti kelompok: PM

Oleh Saiful Haizan Hasam dan Mohd Iskandar Ibrahim
bhnews@bh.com.my

Kuala Lumpur: Tan Sri Muhyiddin Yassin menegaskan tindakan meletak jawatan sebagai Perdana Menteri sememangnya pilihan paling mudah untuk menyelesaikan kemelut politik ketika ini.

Bagaimanapun beliau menjelaskan, tindakan itu yang turut membabitkan seluruh anggota Jemaah Menteri akan memberi kesan ke-

pada rakyat dan negara yang kini berdepan krisis kesihatan akibat pandemik COVID-19.

Katanya, tindakan beberapa ahli Parlimen menarik sokongan kepada beliau menimbulkan keraguan keabsahannya sebagai Perdana Menteri dan kedudukan Perikatan Nasional (PN) sebagai kerajaan.

“Dalam keadaan ini, saya mempunyai dua pilihan menurut Perlembagaan Persekutuan. Saya boleh memohon perkenan Yang di-Pertuan Agong untuk membubarkan Parlimen dan mengadakan pilihan raya atau meletak jawatan.

“Saya memikirkan dalam keadaan tiada seorang pun ahli Dewan Rakyat lain yang mendapat sokongan majoriti pada masa ini, Perdana Menteri yang baharu tidak boleh dilantik menurut Perlembagaan.

“Apabila Perdana Menteri tidak boleh dilantik, maka Kabinet pun tidak boleh dilantik dan kerajaan

baharu tidak dapat dibentuk.

“Apa akan jadi kepada negara kita sekiranya krisis politik berlarutan dan kerajaan baharu tidak dapat dibentuk dalam kadar segera?

“Kerajaan mana yang akan memastikan program vaksinasi berjalan lancar dan mengikut jadual?” katanya pada Ucapan Khas Perdana Menteri yang disiarkan secara langsung, semalam.

Muhyiddin berkata, jika beliau meletak jawatan pada masa ini, seluruh Jemaah Menteri perlu melakukan tindakan sama dan secara tidak langsung kerajaan PN yang mentadbir negara akan jatuh.

Jelasnya, sehingga saat ini, tiada seorang ahli Parlimen yang dapat membuktikan memperoleh sokongan majoriti untuk membolehkan Yang di-Pertuan Agong melantik Perdana Menteri baharu.

“Sedangkan tempoh dua bulan akan datang adalah amat genting. Jika semua perancangan ke-

rajaan dapat dilaksana seperti yang dijadualkan, kita akan mencapai imuniti kelompok pada bulan Oktober.

“Sekiranya terganggu dengan kemelut politik yang tidak berkesudahan dan kerajaan yang sah tidak dapat dibentuk, sasaran imuniti kelompok tidak akan dapat dicapai dan nyawa rakyat akan terus berada dalam bahaya,” katanya.

Mengulas lanjut, Perdana Menteri berkata, beliau berasa sedih dan dukacita dengan perkembangan politik yang sedang berlaku.

“Hari ini, di hadapan saudara dan saudari semua, saya ingin

bercakap secara jujur dan berterus terang. Sebagai seorang manusia, saya tentunya tidak terhindar daripada kelemahan dan kekurangan.

“Apa lagi dalam keadaan saya sebagai Perdana Menteri yang memikul suatu tanggungjawab berat untuk mengurus pandemik yang luar biasa ini sejak lebih setahun yang lalu,” katanya.

Beliau bagaimanapun percaya negara akan pulih dan berupaya mengembalikan kegemilangannya terutama dengan pelaksanaan Pelan Pemulihan Negara (PPN) dan peningkatan Program Imunitasi COVID-19 Kebangsaan (PICK).